

四庫全書

集部

欽定四庫全書

兩宋名賢小集卷三百二十五

宋 陳 思 編

元 陳世隆 補

龍洲集上

劉過字改之泰和人自號龍洲道人宋南渡後以詩  
俠名湖海間陳亮陸游辛棄疾世稱人豪皆折氣岸  
與之交宰相周必大聞其名欲客之門下不就飲酒

欽定四庫全書

兩宋名賢小集  
卷三百二十五

放豪如過潤州登多景樓有山外青山樓外景及斗  
酒羣肩風雨渡江之詞至今傳頌叩閣一書請光宗  
過宮辭意懇婉聲重一時嘗以書干用事者陳恢復  
方畧謂中原可一戰而取不聽以是落魄無所遇合  
晚年欲航海抵崑山友人潘友聞留之尋卒于崑山

襄陽歌

十年著脚走四方胡不歸來兮襄陽襄陽真是用武國  
上下吳國天中央銅鞮坊裏弓作市八邑田熟麥當糧

一條路入秦隴去落日彷彿見太行風俗沈渾士奇傑  
嗚嗚酒後歌聲發歌曰人定兮勝天半壁久無閒歲月  
買劍傾家貲市馬託生死科舉非不好行都兮萬里人  
言邊人盡粗材卧龍高卧不肯來杜甫詩成米芾寫二  
三子亦英雄哉

多景樓醉歌

君不見七十二子從夫子儒雅強半魯國士二十八將佐  
中興英雄多是楚陽人丈夫生有四方志東欲入海

欽定四庫全書

四庫全書  
卷三百二十五

西入秦安能醒齷守一隅白頭章句浙與閩醉游太白  
呼峨岷奇才劍客結楚荆不隨舉子紙上學六韜不學  
腐儒穿鑿注五經天長路遠何時到側身望兮涕霑巾

村墅

俗子有錢村亦樂秋田米熟歌牛角三家村墅無官方  
夜半呼盧笑聲謔尋思我輩不如君平生讀書復苦辛  
遭逢喪亂未得志長策短藁無由伸不如賣劍買牛去  
也學此翁村社住只愁夜半月明時得意無人和詩句

寄孫竹隱先生

隱一作湖

竹湖之人英劇縣勇自試三年種桃李遺愛及僮稚咸  
欲父母之謂我公之子獨有督郵嫌見謂不事事瑕疵  
催科細欲以三尺治八月羈僦樓半年縻隱市小窓天  
日晴灑落自胸次抖擻舊塵埃楮札左右置寄傲點畫  
間揮染當遊戲人賢世所希嗜好人共貴車馬鬧填門  
載酒日紛至大書及豪放小草亦娉媚斂藏經綸業進  
此第一義玉板抄歌詩石碑刻圖記人家錦為軸高壁

垂至地襲藏軟工拙臨寫費同異爭如老劉子落魄一  
狂士半生不讀書頗能會其意寒泉驢馬飲平陸蛟龍  
起得非久憂憤于以發奇氣政使鐘鼎疎自足名一世  
毛錐久見絕一見尚能喜酒邊袖與詩不譽亦不忌有  
時奪之去箱篋餘故紙如持將軍誥屢博姑蘇醉

答曹元章

并序

曹元章以謹畏喜義雅為鄉里所重縣官自令佐以  
來皆敬之疑若取友必慙莊之士乃如某者寔自放

于禮法之外元章既不以狂棄之方且粉飾語言以媚無非議我者惜乎相知而未深也唐賀知章逆知開元末年之變託意鑑湖一曲以歸落魄四明自號狂客至相率李白劇譚痛飲呼為謫仙由今觀之豈不甚怪然黃冠錦袍屣棄爵祿與夫炙手權門推而不去者其人品孰賢否孔光張禹皆大儒平日託經自文當王氏墓木未拱之秋相與唯阿無骨鯁臣子氣自劉更生死天下公論之口皆藉而不敢肆鼎祚



陸沈繫誰之罪吾觀天下齷齪之士滔滔皆是後世  
必有好予之狂者則又繫之詩其辭曰

先生脩廉隅日日自敬畏老大寄杯酒狂亦非所諱酸  
鹹雖不同各自有正味切莫對癡人說夢其詞費

呈徐直院二首

當年今日誤承恩自倚容華託至尊門外游絲難駐目  
依然青草暗長門

猿臂將軍戰不休當年部曲已封侯夜深忽夢燕山月

猶幸君王晚更收

呈王山父二首

疎煙淡淡樹重重  
畧得西南有路通  
鍾板不鳴山寺靜  
閉門人在月明中

辦得茅廬我便歸  
玉堂何處有梅枝  
歲寒老樹猶荒寂  
會有臘殘春盡時

王農丞舟中

危檣高占飛鷗字  
京淮兩路傳宣使  
面如玉盤腰有金

見說京淮已無事儒生性命何足憐十年厭聞烽火連  
一朝悔禍亦不惡且願四海皆安眠

贈經長老

菜肚老人禪已飽憂人從吏作詩僧客來無處著歡喜  
一語不曾談葛藤

送客剡溪

送客山陰路春風散馬蹄縱觀神禹穴深去子猷溪嫩  
草綠于染珍禽嬌已啼去程千萬里步步有雲梯

方竹杖

鶴骨風前瘦龍姿雨後鮮  
鋒稜四面峻節操一生堅  
荷篠行隨適看山倚最便  
從教方有礙終不效規圓

遊古仙巖

白蘋風裏步清秋來作靈巖古  
洞游笑倚飛雲訪仙迹  
夕陽無語伴人愁

辭周益公丞相

一曲歸歟浩浩歌世間無地不風波  
人從貧賤識者少

事向艱難省處多紫塞將軍秋佩印玉堂學士夜鳴珂  
太平宰相不收拾老死山林無奈何

謁郭馬帥

千金買駿馬百城市蛾眉長安酒家樓揮洒驚人詩天  
子不得臣公卿氣吞之俯視兒女輩自詭男子奇誰知  
金陵都五年重來茲黑貂日以敝塵埃鬢成絲故人風  
雨散知己今為誰郭侯山西英而有熊豹姿巍峩西忠  
廟喬木人所思垂芳到雲仍大將奕世為兄弟各三衙

父子步武隨萬戶侯冠軍金印何累累雖然平戎策終  
鬱未得施方今羣雄擾似覺敵運衰強鄰軍其西國步  
日以遲疆場互彼此干戈極猖披盜賊毛蝟起斂民極  
刀錐父老思漢官壺漿徯王師吾君自神武妙算出籌  
帷收覽天下才尺寸不可遺機會一日來恢復此其時  
況如郭侯者禮賢正謙卑使之會雲龍列城歸指揮安  
知古中原不使同驅馳過也久淪落狂名諸公知然亦壯  
心胆志慕効驅馳脫靴奴將軍舉扇障元規有音世

不賞詩酒聊自嬉霜風忽無情一夜徹吟肌高卧百尺樓閉門無晨炊起視匣中劍依舊光陸離有恩或有報一死所不辭

代壽韓平原二首

衣鉢登庸復舊氈文王尚父趙平原自從慶厯到今日只說開禧初改元朝闕東齋廣東閣夜看南極照南園九霞觴舉先旬浹却領千官壽帝垣

際會風雲振古難十年袖手且旁觀要令隣敵尊裴度

必向東山起謝安一品千齡靈壽杖五公四世進賢冠功  
成裂地封留了却趨赤松盟未寒

聞鶯

東風扶日上花枝恰恰幽禽弄暖時百轉忽驚春夢破  
間關石上話相思

春日即事

久客無人問所須小窓翻得逐癡愚黃昏以後酒三盞白  
日之間飯兩盂穀雨筍茶俱俊美條風菊杞盡甘肥



先賢且謂可復踐況是生平山澤癯

題潤州多景樓

金山焦山相對起挹盡東流大江水一樓坐斷水中央  
收拾淮南數千里西風把酒閒來愁木葉盡脫人間秋  
煙塵茫茫路渺渺神京不見雙淚流君不見王勃才名  
今蓋世當時未遇庸人爾琴書落魄豫章城滕王閣中  
悲帝子又不見李白才思真天然時人未省為謫仙一  
朝放浪金陵去鳳皇臺上望長安我今四海行將遍東

歷蘇杭西漢沔第一江山最上頭天下無人獨登覽樓  
高思遠愁緒多樓乎樓乎汝奈何安得李白與王勃名  
與此樓長突兀

挂塔松窩

十年南北走東西豪氣崢嶸老不衰快斬妖魔三尺劍  
朗吟風月五言詩山無福地我焉往神有靈丹世不知  
却恐松窩知此意一絲挂塔去何疑

上袁蘇州三首

骨秀如仙孕武夷故教手筆世宗師隸分唐漢諸家字  
句壓陳黃二子詩茂苑雨晴花發處洞庭霜重摘黃時  
塵埃俗吏那能比一段奇功自可知

車馬城中早已忙子城內裏看星郎十州已茂園靡草  
一炷初凝畫戟香銅剖虎符新雨露玉持使節舊風霜  
明年櫻筍成時候不在烏臺即玉堂

欲上姑蘇望虎丘小邦寧有此風流山川形勢今三輔  
人物英雄古列侯華屋鱗鱗冠蓋里畫橋曲曲管絃樓

金陵蜀郡俱踈遠除却皇都第一州

謁京口張守二首

未至諸人各已侯一麾猶此滯徐州誰知安石恐未免  
欲借寇君何可留遺愛與山同北固平生作計豈東周  
上方已聽尚書履聲在星辰最上頭

危樓年少記登臨老矣重來力不禁風月欲談嫌許事  
山川不險似人心淡煙衰草鄉關遠細雨黃花節序深  
雖有小詩行樂處世無知己為誰吟

閒步

山徑無人鳥篆沙  
杖藜閒看摘新茶  
錦綳委地筍翻籜  
黃玉滿林松帶花

歸耕

途窮百無成  
或許營菟裘  
依然大槐宮  
蟻穴夢封侯  
人生眠飯耳  
物外亦贅疣  
科名付諸公  
老矣我當休

梅花五首

人間不盡春  
來意恰則一枝清  
影疎更得和羹幾時在

祇今風月尚新除

香意惱人休不得荒林月裏夜相過  
花應笑客有底急客若不來花奈何

凍雲垂垂雪欲落雨澀風慳如此寒  
分折南枝與君看老夫自要北枝看

高門拂日瓊為樹呼我不來那肯過  
不知此花有何好寒鄉日月用亡何

寂無人語斷回程日落未落孤山橫  
平湖水濶何許去

傍竹邊松自好行

盱眙行

車徐行馬後馳天寒游子來盱眙功名邂逅未可知生  
平畢竟欲何為既不起草黃金闥又不侍宴白玉墀何  
不夜投將軍飛勸上征伐同驅馳滄海可鎮山可移男  
兒志氣當如斯安能生死困毛錐八韻作賦五字詩金  
牌郎君黃頭兒有眼不忍重見之志大才疎浩無期逢  
人舉似人笑嬉謂之癡人未必癡喚作奇士何能奇

欽定四庫全書



兩宋名賢小集  
卷三百二十五



兩宋名賢小集卷三百二十五

欽定四庫全書

兩宋名賢小集卷三百二十六

宋 陳思 編

元 陳世隆 補

龍洲集中

上范祕監二首

郡大當塗古分符得少蓬威如烏府在令與繡衣同鈴  
閣紬書外花村賣劍中少需撫摩意來作玉堂翁

疇昔經行路黃山更一過天涯知己少歲晚客愁多路  
斷車生角冰堅水不波使君森畫戟聞此意如何

和危府教三首

先生場屋文之虎氣攝狐狸自不知老去莫嫌官尚冷  
灞橋風月要新詩

天上羣仙臺望居芹宮未是辱泥塗莫邪變化須臾事  
一點一鎔金在爐

行脚諸方履歷深似和禪子寄叢林試拈朝報一轉寤

以道觀之無損心

上劉知州二首

戟外梅花角有聲使君心與日華明郡當采石今衝要  
船在烏江罷戰爭酒賤人家歌袴飲地寬客子帶刀耕  
太平官府無公事見說香凝燕寢兵

草樹荒煙晚葉枯又尋短棹泛焦湖場經古戰心欲折  
客老諸侯飢更驅去國寂寥從白眼籌邊謀畫看鴻儒  
袖詩來謁公應記曾就襄陽厠坐隅

春日即事

薄雲籠日護初晴  
沙岸朝來春水生  
閒傍柳堤騎馬去  
一鞭春色柳絲輕

賞心亭

何人將我來此游  
白鷺那知客有愁  
如子矜持山玉立  
似予迂濶水盤洲  
塵襟抖擻風雲入  
石刻摩挲歲月流  
惆悵謫仙鸞馭遠  
離離別恨黯難收

清溪閣次胡仲芳韻

瓊樹枝新梅蕊迸與君攜手清溪問舊來俠客歌舞場  
何似詩人風雪逕溪邊傑閣高峻層左右華屋連雲夢  
依稀王謝鳴珂里彷彿秦箏雲母屏古來繁華各衰歇  
只有不磨惟壁月小船何處載愁來哀怨一聲吹笛裂

從軍樂

蛟龍寶劍鵬鵠刀黃金絡馬花盤袍臂弓腰矢出門去  
百戰未怕臯蘭麝酒酣縱獵自足快詩成橫槊人稱豪  
但期處死得其所一死政自輕鴻毛將軍三箭定天山

丞相五月入不毛生前封侯死廟食雲臺突兀秋山高  
書生如魚蠹書冊辛苦雕篆真徒勞兒時鼓篋走京國  
漸老一第猶未叨自嗟賦命如紙薄始信從軍古云樂

次劉啟之韻

豪結交游三十年暮年識子海霜邊江西折派詩同社  
鴻寶傳家子已仙無用白鬚甘我老有才青眼望誰憐  
譬如飄泊湓城下篁竹蕭疎無管絃

送術士

一性圓明俱是佛四方落魄總成仙  
逢人只可少說話賣術不須多覓錢  
退一步行安樂法道三箇好喜歡緣  
老夫亦欲挑包去若要相尋在酒邊

寄王巽伯

朋從紛如雲愈覺居索甚肺肝百憂集  
五夜不安枕長恐鐵石心化作萋其錦  
日暮懷佳人霜風悄寒凜

遊清潭呂資益蟠谷十絕

清潭



卷三百二十一  
一潭清淨久無泥潭岸無泥石更奇擬待月明垂釣去  
前溪雨足怕龍歸

蟠谷

逶迤路逐驚蛇去轉盼不知身已高雪積萬層山四合  
碧油幢外有旌旄

飲綠

野花紅白倚巖開只可臨風自一杯謹莫放教公子見  
恐攜窈窕入山來

掇羹

老子垂垂秋露下九月空林天氣寒黃花剝開且勿剪  
留得一枝煙雨看

初秋

香不求知色正清清于九畹見飄零山中若有離騷伴  
痛飲我知勝獨醒

漱玉

濕雲將雨過溪東石澗灘鳴水勢雄忽作晚晴秋更好

月來林外透玲瓏

含暉

帝所森嚴寂不喧  
九關虎豹守天門  
何人奏事含風殿  
日晏鳴珂下紫煙

香徑

一花帶藥香氣滿  
何況叢生樹兩行  
風露益高秋雨足  
請君來此撼琳琅

谷菴

穹廬架屋石峻嶒香火西風只一僧  
日晚課經猶未了  
閉門先點佛前燈

碧蓮峯

前山崛起青蓮色淨埽晴空如葉開  
若擬空花猶未了  
空中安得有峯來

春歸

百花開盡到荼蘼一片春心又欲歸  
可恨東風留不得  
漫教啼鳥怨斜暉

村店二首

林深路轉午雞啼知有人家住隔溪一鳥開紅春欲動  
酒帘正在杏花西

溪邊猶棹酒船回冷水灣頭兩意開一路有詩吟不得  
當初悔不共君來

紅酒歌呈西京劉郎中立義

桃花為麴杏為蘖酒醞仙方得心法大槽迸裂猩血流  
小槽夜雨真珠滴峴山之北古襄陽春風爛漫草花香

乘輅誰為部使者金閨通藉尚書郎兒樣愛民真父母  
十萬人家感恩厚鵝兒不酌宜城黃流霞造此江南酒輪  
蹄日日行樂同琥珀澌灩琉璃鍾珊瑚枝下貴公子  
人面日色相映紅闌干十二開簾幙腰鼓轟雷奏仙樂  
翠翹金鳳大隄倡玉纖捧勸羅衣薄人生百感能幾何  
海棠花開春較多有韶可解換一斗醉到天曉待作麼

贈陳時可

交游半世已公卿猶抱遺經對短檠負米過于扛鼎重

選官難似上竿行百年母子相依命一片忠忱誰為明  
煙火小樓風雨夜歲寒時得話平生

贈宗友

中吳喜遇同宗友貌古髯疎亦志高金玉圖書皆長物  
六經之外有離騷

與青原正菴老

倦行老矣徧東南識後青原識正菴無法更求身外說  
有禪應向意中參春風遶寺雨花墜石鼎烹茶泉味甘

暫脫塵囂聊稅駕與君相對款清談

東能仁禮老

幻身到處是空虛習氣依然未埽除  
柏子樹邊尋祖意  
旃檀林下伴僧居  
三千世界初無礙  
十二時辰得自如  
牛糞火堆煨芋熟  
時時拾得懶殘餘

弋陽渡

車聲盡日滑黃泥  
怕聽空桑叫竹雞  
風雨不知春早晚  
柳條拖綠半江垂



游靈巖

風露淒然八月秋瘦藤扶我到山頭僧居突兀飛鴻上人跡依稀似鹿游舊事已空流水在閒情都付落花休越王未是真嘗胆計出嬋娟事可羞

憶鄂渚

我離鄂渚已十年吳兒越女空華鮮不知上游古形勢四十餘萬兵籌邊中原地與荆襄近烈士烈士猛士猛澤連雲夢寒竹圍城樓武昌曉排陣書生豈無一策奇

叩閭擊鼓天不知却思仙人白玉笛匡牀醉倚南樓吹  
貂蟬兜牟兩岑寂若耶溪畔還作客空餘萬鶴舊題詩  
醉筆顛狂驚李白

寄沈仲居二首

十年鉛槧鬢絲秋獨抱成書四海游三國諸人應夢覺  
一番公案又從頭

萬死中原百戰爭流芳遺臭各垂名思量陳壽已饒舌  
又費先生幾管城

遊古山

信步作幽討有菴如此深  
佛燈明老屋秋日淡疎林  
柏樹祖師意松楸老子心  
十年棄墳墓洒淚一悲吟

喜雨呈吳按察

使君人物舊烏臺天聽雖高力挽回  
湖水欲平江已退  
秋田未旱雨先來雲隨黃鶴想何許  
風滿南樓亦快哉  
涼意入秋清似畫月巖知有桂花開

平氏書院

雪屋彈琴泛作聲  
寂無人語紙窓明  
倦游識破諸緣妄  
心與梅花一處清

送王簡卿歸天台二首

枚數人才難倒指  
有如公者又東歸  
班行失士國輕重  
道路不言心是非  
載酒青山隨處飲  
談詩玉麈為誰揮  
歸期趁得東風早  
莫放梅花一片飛

千巖萬壑天台路  
一日分為兩日程  
事可語人酬對易  
面無慚色去留輕  
放開筆下閒風月  
收斂胸中舊甲兵

世事看來忙不得百年到手是功名

六合道中

十年曾記此來游有策中原一戰收  
蒲柳易凋慙勢去金湯無用卒和休  
悲風彷彿鳴刁斗缺月參差照敵樓  
廟食封侯何日事不堪老馬又滁州

湖口阻風

冒雪衝霜已十程狂風又敢危  
吾行無人說向江神道  
莫待明年却世情

舟中

下水南風不覺難  
我舟不動穩如山  
東西日月尋常事  
變化雲煙頃刻間  
沙鳥似驚皆退避  
林壑如畫亦渾閒  
歸期只欲長安近  
屈指何時到此關

寄呂英父二首

清明蕭散坐才疎  
收拾窮愁卻著書  
詩筆有神通寐夢  
丰標不俗更清癯  
黃花細雨醵江路  
落日西風處士廬  
抖擻塵埃舊時帽  
不妨覓句倒騎驢

卷一百二十六  
秋到家山冷不知但驚風路入新詩低頭欲拜無東野  
滿耳惟聞說項斯骨格昂藏雲鶴瘦吟哦悽斷雪猿悲  
文章已得真消息三十科名已是遲

題東林

爾自貪癡不肯閒江南多少好青山老夫為不愛官職  
買得狂名滿世間

書僧寺壁

綠楊染水濃如畫天氣欲晴風自和二月杏花猶未放

一春分外覺寒多

贈侯戎

江淮萬里以詩行  
此老胸中有甲兵  
何止據鞍猶矍鑠  
試教落筆便縱橫  
逢時有用真才出  
知己不遭儒者輕  
若見英雄今馬帥  
為言劉子尚狂生

幽居

對面滄浪可濯纓  
不思汎艇出春城  
浮沈扮社何人重  
俯仰茅簷是事輕  
玉蘂連屏寒徙倚  
蒲萄上架月縱橫



江湖老矣無他願只欲清陰便得成

夢覺

夢回斜日轉花陰時有黃鸝送好音  
高卧草廬人不識東風啼鳥獨知心

過垂虹訪江仲冕

一作姑蘇送王武岡不值訪汪仲冕席上口占

嚴城夜出鼓鼙聲畫鷁三更不見蹤  
何必披雲尋樂廣真成避雨識茅容  
蘚花似雪玲瓏白臘酒如春琥珀濃  
若使世間無我輩老夫何處不窮冬

觀白鷺洲風濤

一聲雷鼓快風威  
頃刻衝濤沒釣磯  
行客曉看銀漢落  
陽侯驚起玉山飛  
蛟龍使爾爭先化  
鷗鷺茫然失所依  
安得長竿入我手  
翩然東海釣鰲歸

上周益公二首

游戲公孤了歸來  
不愛名昌黎前進  
士司馬老先生有  
節花宜晚無波水  
自平翳雲遮不得  
南極益精明

早被儒冠誤依稀  
老更侵科名數行  
淚岐路一生心自

借亡猿木誰憐躍冶金使無鍾鼎志何地可山林

除夜寄盧申之

見說盧夫子詩成手自書雪便金帳暖雲壓玉川居  
椒葉儲名酒萍蘆薦野蔬夜寒禪牘鼻應念馬相如

兩宋名賢小集卷三百二十六

欽定四庫全書

兩宋名賢小集卷三百二十七

宋 陳思 編

元 陳世隆 補

龍洲集下

謁江華曾宰二首

摠衣三十年前事曾以諸生傍絳紗一國所專吳白下  
雙鳬獨遠令江華時來館學總餘事老去衣冠懷古家

共怪我門郊島外狂生尚有一劉義

鬢鬢已皤非故我依然破帽老騎驢江邊游子斷腸句  
漢殿逐臣流涕書父母松楸三世塚弟兄桑梓百年居  
孤丘未死歸心切未有相如駟馬車

寄湖州趙侍郎

桑柘村村煙樹濃新秧刺水麥梳風舟行苔雪雙溪上  
人在蘇杭兩郡中鼓角麗聲相旦暮旌旗小隊間青紅  
主人夙有神仙骨合住水晶天上宮

簡季文

衰鬢蕭騷半欲絲尚能隨隊作兒嬉  
棊無殺意從人活琴有仁聲却自悲  
落魄陳平歸漢日中傷張祿入秦時  
諸公莫作狂夫看恐是英雄未可知

贈劉叔擬招山

不醉何勞飲無詩底用吟  
百年為客老一念愛鄉深  
草路青原淚煙波白鷺心  
班超歸未得愁見舊家林

登清涼臺

江南江北許多山到處登臨得凭闌  
老木漸丹霜有信  
怒濤衝岸水生寒倦游半世烏三匝  
往事千年指一彈  
落日正西催上馬依依回首望長安

蘄洲道中

如箭陰風劈面吹雪花斜夾雨垂垂  
胸中自有平戎策  
路入蘄州冷不知

觀三疊泉

五老峯北差幾顛龍泉三疊來自天  
只因開闢便有此

山雲蔽護經歲年一朝何事失扁鐫樵者得之人共傳  
欲往從之人憚遠險溪絕壑窮攀緣初疑霜崩漏天  
谷翻若雲奔下巖宿散為風飛颺輕煙垂似銀絲貫珠  
玉隨風變態難盡名洞駭遊者心與目清寒侵袂心益  
爽清甘熨齒手屢掬我欲攬之作玉虹開似九丈錦屏  
風有若插碧金芙蓉笑騎揮斥凌太空窮源直到天河  
東

西湖



西湖湖上山如畫二十年間曾客來飛絮滿城歸未得  
江南老却賀方回

登昇元閣故基

脚力倦矣曷少休侵晨更作昇元游眼中已不見二百  
四十尺之高樓但見炊烟萬竈宿貔貅上有啼鴉噪鵲  
如泣訴下有藤蔓老樹根據枝相糾想其結締初匠石  
巧與造物侔拼拱不知幾大厦一木牽挽回萬牛山川  
退聽左右受約束日月烏兔早暮東西流阿房之旂矗

立矮如戟臨春結綺望仙三閣俱下頭盃塊潛培樓  
而已矣蹄涔洞庭芥為舟拄撐霄漢彈壓大千界下歷  
梁唐秦隋晉漢周一朝世故有翻覆禍結祝融回祿與  
鬱攸灰飛障天煙焰熾一火三月爛不收遂使觚稜化  
草莽丹雘成墟丘我聞至人侈儉初何心有茅一把蓋  
頭便可留何必窮極土木事妖怪腹削赤子膏血斂以  
哀是故子劉子不仙不佛亦不侯視鸞臺鳳閣為蓬廬  
百萬買宅亦夢幻泡影漚江西豈無家白沙翠竹泉石

幽小亭茅簷曝日搔背癢籬缺牆破手葺修如以天地  
為室廬日月行住坐卧得自由不為朱門是不為白屋  
羞有時騎馬千里游汗漫有時蛤蜊遽食龜殼秋彼昇  
元閣者亟成而復壞腸亦不能為之斷心亦不能為之  
憂造物何足云此身自贅疣譽堯毀桀未必公是非丘  
踞兩窖螻與蟻日斜諸公急下山我有斗酒歸去來兮  
相與勸酬

舟中偶作

日日拖舟上碧溪寒灘水淺草離離尺書雁斷歲行盡  
五兩風輕帆去遲白鷺導吾如有志丹楓愁客亦何為  
關頭安趁梅花約更著寬程五日期

聿追菴題壁

路轉羊腸曲山藏蝸角深樹多成蔭密水少亦悲吟露  
草重陽淚花寒食心摩娑墓銘看久立讀碑陰

同郭殿帥游鳳山

廉纖小雨久于霏喜得新晴亦快哉五色波光麗鵲

千分雪氣繞蓬萊旌旗側畔宮牆轉  
戈戟叢中武庫回  
走馬看花生怕晚果然桃李一山開

郭殿帥邀游鳳山

結束戰袍騎戰馬冠帶將軍宛如畫  
前呼小駐來美堂  
箭去弓鳴飛鳥下青林路轉入峒嶺  
湖亭海觀爭為高  
誰知鳳舞龍飛外別有樓閣橫雲霄  
回旋左右皆游歷  
人物江山兩英特風流標致梅嶺梅  
磊落胸襟石林石  
側身更上天上行好風吹下笑談聲  
山神川后領要束

遁走虎豹藏蛟鯨摩挲苔蘚題詩去萬鼓聲中雜歌舞  
衆賓捧酒壽主人將軍自是擎天柱看山看水時一來錢  
塘吳越何小哉拍點中原百城在功名逼人有機會

感舊

羅結同心抑帶青碧挑香裏寄將迎春風重到憑闌處  
腸斷江樓不忍登

自述二首

扁舟送客出姑蘇晚泊吳江夜雨餘波浪稍平風力定

青黃相間摘林疎  
匆忙旅館催行酒  
草率盃盤旋買魚  
我欲壁間書歲月  
無人為上小行書

精神凋耗鬢毛衰  
劫火光中穿幾回  
無可奈何教老去  
有時猛省忽愁來  
師崇道學原非偽  
客寄蘇州却類猷  
明日重陽又佳節  
得錢且醉菊花杯

吳尉西亭二首

襲挂行香徑  
朱闌稍轉西  
水風飄石冷  
雲月墮簷低  
基敗深杯罰  
詩豪健筆題  
舞忙釵鬢亂  
更為捧柔荑

石板橋東閣軒窓如此華碧虛澄水鑑紅影浸霜花似  
串歌雲駐如泥醉帽斜但驚風露冷飄落怕還家

寓東陽寺二首

元帥東陽主今君我故人可憐九華客猶是一窮民古  
者狂狷士人間自在身化工都不管何地有陽春  
不學老無似艱難却飽諳遠從陶靖節來訪杜征南意  
到羹藟適貧猶食齋甘惜無廬可卧尚遶鵲枝三

游郭希呂石洞十九絕



清曠

筍輿咿啞來路轉此歇脚長風挾林下深意滿萬壑

深秀

蒼髯萬松官窈窕一徑開請回俗士駕切莫呵殿來

書院

力學如力耕動情爾自知便使書種多會有歲稔時

谷口

水流自何許遠欲窮其源石梯苔蘚層微有屐齒痕

月峽

兩崖限東西裏有一帶天老蟾更多事駕月下潺湲

桂壑

叢叢萬橫枝羅生雜松篁不似巖穴凶歲晚正自香

小爛柯

遊戲一彈碁歲月隙駒過不如兩忘機石上跏趺坐

傾月

去去山轉深樹下亦淒冷時有月鳥飛閒碎梧桐影

閼雲

仙宮已降勅雅有新遷除乞為此閼使雲物屢卷舒

高碧

小山碧巉巖直上與天齊詩成欲磨崖藤蘿費攀躋

石井

銀牀遶周遭一規寒浸水試敲拄杖看恐觸蛟龍起

壺天

逆溪隨水行更上紫翠峯朱闌忽飛閣映帶烟霞重

玉佩

借榻卧雲屋歌枕仔細聽誤疑鳴珂聲不知水泠泠

飛雪

山前大飛雪路有何處入蒙茸六花飛冷濺征衣濕

笙鶴

木末俯清軒獨立久延佇何人騎鶴來彷彿吹笙侶

韜玉

至寶不自獻韜藏亦英華餘香披草木秀擢幽巖花

倚劍

石壁自磨礪三歎用不久如去到人間為儂洗磨垢

藥圃

古文不可賣未覺賣藥非侵香荷鋤徑暮得芝朮歸

玉泉

石礪沙汰盡悠悠潭影斜塵襟不忍濯為惜無玷瑕

兩宋名賢小集卷三百二十七

欽定四庫全書

集部

兩宋名賢小集卷三百

三十五至

詳校官中書

臣閔思毅

助教臣常循覆勘

總校官編修

臣

王燕緒

校對官編修

臣

王天祿

謄錄監生

臣

王光遠

欽定四庫全書

兩宋名賢小集卷三百二十八

宋 陳 思 編

元 陳世隆 補

端隱吟藁

林尚仁字潤叟福州長樂人家貧刻苦攻詩每有所作  
微不合意輒裂去卜居半邨半郭間手自種竹題  
曰竹所吟嘯其中自號端隱以示終于遯跡之意吟

藁一卷淳祐辛亥陳必復為序稱其詩專以姚合賈  
島為法而精要深潤過之

飲藥房陳戶山居分韻得閣字

常人厭寂寥隱士畏喧雜山居主人百好無終日哦詩  
閉書閣我本山中心事亦頗合杖藜約客行幽深來  
扣吟扉坐陳榻不叙寒暄說晚唐滿座春風屢傾榼霜  
晴沙路軟如泥谷鳥相呼聲自答花時不飲空白頭世  
味由來如嚼蠟祗憐無夢化作蝴蝶飛遶盡百花深處



日千匝

暑夜

松風生晚涼坐久市聲歇客去行獨吟踏石碎明月

題蘆鄉思歸圖

不畫梅花却畫蘆自言家在箇鄉居當時恨不曾添雁  
為帶平安一紙書

九日登烏回寄鄭渭濱

烏回山下寺閒抱一琴游客路黃花晚江城寒露秋持

書誰送酒懷古獨凭樓想爾西風裏遶離吟未休

和陳葯房納涼

貪涼分石坐野服岸巾紗竹暗鳴風葉溪暄聚水花深  
村人語靜高樹鳥飛斜不飲論文酒敲棋煮夜茶

贈歌者

聲逐嬌雲學鳳鳴王孫幾醉拍欄聽春深莫唱關情曲  
多少行人過柳亭

新昌道中

春紅落盡雨霏霏為怯輕寒尚夾衣  
村路每于泥處滑鄉音漸與市人非  
護蠶谿女條桑去抱布山翁換米歸  
世味徧嘗只如此幾番清夢落漁磯

寓華亭下砂鹽場

地僻民居少官勤國課優  
遠程驅瘦馬小港礙行舟  
晴日鹽花晚風潮海氣秋  
野人因買鶴半月此遲留

秋日書懷

十年客路歎飄蓬  
歷盡風霜鬢欲空  
睡少半疑茶作祟

愁多全覺酒無功  
數蜚厭靜鳴秋雨  
一葉驚寒落晚風  
惆悵故園歸未得  
草荒籬下菊花藂

適越留別

江亭飲罷起離愁  
何事西風又越游  
潮信欲來人欲去  
夕陽紅蓼滿汀洲

此山林僉葯房陳戶偕張牧隱暮春晦日載酒相  
過席上以手揮素絃為韻得絃字

春詩敲未穩  
一醉傍琴眠  
吟客相過日  
飛花欲盡天  
竹

陰池水暗樹色島雲連幽鳥可人意數聲清似絃

寒夜即事

吟苦過于顛吟成亦自憐凍油燈影薄深屋語聲圓分  
月照歸客避寒移卧氊一冬少閒日不得到梅邊

春日偶成

未逢知己愧蹉跎又見春風長徑莎杜宇一聲詩思減  
楊花三月客愁多從人乞米貪如舊借吏鈔書字半謔  
懶記江湖十年事近來平地亦風波

廢寺

勅額雖存屋半傾  
爐香無主佛無靈  
豪家不管空門事  
日夜西風語塔鈴

自賦

學書學劍兩無成  
天乞梅邊隱姓名  
未必清閒非盛福  
縱教富貴亦虛榮  
百年有限春風老  
萬事無心夜月明  
何計莫餐烟火供  
漱流眠石過今生

送林雲岫歸省

西風吹客衣束擔出王畿千里莫嫌遠幾人猶未歸山  
空秋鶴瘦天濶暮雲飛料得還家日將詩壽綵闈

雨中和張西麓

雨聲聽易厭况復事關心終夜不成寐一春徒費吟委  
紅花命薄重碧酒杯深何日西湖上移船繫柳陰

連雨留宿陳葯房吟所

谿水分流急谿雲帶濕飛防飢童乞米畏冷客添衣雨  
院棊聲潤風窓燭影微終須待晴去踏月夜深歸

偶題

矮屋過如斗樣寬  
閨門渾不受春寒  
海棠睡去梨花瘦  
次第東風到牡丹

弔友人墓

樹陰雲影暗空山  
銘石雖存不忍看  
燒罷紙錢灰未冷  
落花啼鴉雨聲寒

游陽明洞天

每箇虛亭坐片時  
旋尋古蹟上巖梯  
石含秋色苔痕老



洞接雲天樹影低  
樵客出林驚虎嘯  
道人臨水聽猿啼  
吟邊欲記陽明事  
恐動山靈不敢題

清真觀

一宮占斷水中央  
瘦竹添丁護短牆  
老鶴聲中松子落  
遊魚影裏藕花香  
雲房不雨琴常潤  
池閣無風扇自涼  
擬辦隱心終老此  
便須歸與鶴商量

春晚

春事又無幾  
陰晴苦不齊  
久貧交味薄  
多病語聲低  
落

絮行風徑歸雲度晚谿故鄉二千里日夜子規啼

贈褚雪巖

多年林下隱猶帶舊儒酸自說因詩苦還如學易難曉  
窓花氣潤夜枕雨聲寒又欲名山去應尋勝跡看

村居即事

外事少曾聞深居似隱君谿明花照影風細水行文蠶  
室寒初閉蜂房早已分偶因尋藥去踏破一村雲

寓舍留別

撥盡寒灰雨夜深半窓燈影伴孤吟不眠只有琴知得  
明日陽關何處心

課伐木

手揮樵斧氣如虹幾樹寒煙一餉空午夜無依烏鵲冷  
數聲應恨月明中

懷潘寒巖

別後空相憶無書直至今頻年千里客多事半生心卯  
酒欺人醉春詩帶病吟倚欄政無緒一鳥過花陰

余種竹方成扁其室曰竹所友人以詩至用其韻  
屋老苔荒席久虛近分一榻與雲俱梅花未種招蜂怨  
竹所雖清欠鶴圖無事看山如對客有時隱几亦忘吾  
過門除却能吟者不是高僧即老儒

山居

帝城花錦地讓與市人居萬事不到耳一貧惟著書掃  
牀留月宿種藥帶雲鋤未晚多先醉為官恐不如

簡許有實

閒磨霜刃破銀瓜沈水香銷日影斜吟客不來情思懶  
晚風庭院落槐花

陳葯房聞人禹谿黃平嶺春日相過分得琴字

半生無厚業祇合住山林留客旋沽酒典衣因買琴晴  
窓行野馬高樹語春禽彼此知心久相看意轉深

過友人幽居

門似野人家空園擬種瓜有僧分石坐無酒問鄰賒獨鶴  
喜欲舞老梅寒自花此身歸未去猶愧暮林鴉

旅懷

欲暮西風引客愁十年如夢住他州故交零落誰知己  
往事淒涼歎白頭一紙音書燈下淚滿城砧杵月明秋  
早知世路風波險只在山中煮石休

懷蒲一菴許紉品

新營一榻養天和獨喜身閒鬢未皤藥性不諳緣病少  
花名慣識為吟多移書曬日防留蠹寫帖臨池擬換鵝  
不到玉峯今兩載故人情味近如何

陳藥房舟中分得詩字

移舟春岸曉  
小雨欲晴時  
煙樹望宜暗  
水程行較遲  
推蓬山色近  
得句野鷗知  
來往無多路  
歸囊又一詩

寄表兄鄭古潭

江湖風浪惡  
飄泊此依依  
白髮親俱老  
深春人未歸  
雲留行李住  
風遣落花飛  
強飲杯中物  
芳心莫易違

閒裏

閒裏身心得  
自如春風茅  
屋燕同居  
松花滿地谿  
雲滑

一榻晴窗卧看書

寄西湖友人

湖邊春更好別後費吟思  
載酒曾游處憶君同醉時  
面風花落易背日雪消遲  
早晚攜琴去山中與鶴期

送友人別

此心偶無事君復叙離情  
江國多寒色春風幾日程  
雪添行李重船逐浪花輕  
後夜應相憶空山月正明

送楊巨川游邊



此行不必話離愁且舉匏樽醉幾籌天下豈無山可買  
男兒當與國分憂劍辭星匣邊風凜船駕雲帆海月流  
莫道讀書無用處讀書方有用兵謀

寄鄉友

此身拘不得暮楚又朝吳故友幾人在三年一字無天  
風潮信急江月雁聲孤久不看明鏡年來有白鬚

寄吳宗之

在家猶苦熱客路足應疲書劍果何地江湖非舊時久

全八  
卷三  
百二十八  
晴苗欲雨多病藥如飴憶自分攜後知心更有誰

雪中呈社友

風雨瀟瀟攪雪飛一寒如此只貪詩酒瓢傾盡囊金少  
恐被梅花笑不知

送陸月湖歸玉峯

行李無多半是詩買船兼載鶴同歸思君晚泊吳江冷  
風捲蘆花幾雁飛

喜友人為僧

身披雲袖瘦伶俜一剌新添得寺名餐供未便跣足坐  
誦經猶作讀書聲禪窓欲晚聞鍾掩吟履逢秋踏葉行  
應是千生修得到幾人頭白尚無成

贈許紛岳

年齒未三十清名已照人才高猶苦學俸薄不言貧留  
客醉終日愛花吟過春自憐閒未得滿眼撲京塵

辛亥元日游聞人省菴園和陳葯房韻

倚欄吟未穩把酒問溪山今日又添歲一冬無此閒梅

花依竹靜雪意避春慳次第燈期近重逢一解顏

賀陳石泉宰華亭歸

天下稱繁邑一廉如此希政成人惜去官滿鶴先歸家  
學傳金管春風入紫薇知音正當路健翼看高飛

夜坐

焚香獨坐勘騷經庭樹無風葉不鳴靜入夜深聞鼓吹  
一池明月亂蛙聲

梅雨

繁聲不可聽，點滴似秋霖。  
谿長欲無岸，窓低微復陰。  
葛衣涼意重，礎石潤痕深。  
欲出愁泥濘，依依獨客心。

訪隱者

姓名多已在仙行，見說曾傳辟穀方。  
未必詔書徵便起，可憐人世老猶忙。  
浴蒲澗冷雲初濕，種朮山春土亦香。  
何日此身分半隱，歸須先製芰荷裳。

戲友人買侍兒歸

幾扣吟窓多不遇，識君雖久會君稀。  
近聞行李擔書去，

添得明珠伴劍歸  
開甕酒香春繞屋  
倚欄人醉月侵衣  
野夫別有觀心法  
不在深山獨掩扉

鶴

楚楚異凡禽  
相看瘦不禁  
飢尋芝朮晚  
夢憶海山深  
華表千年事  
青天萬里心  
一聲唳清夜  
霜月滿疎林

兩宋名賢小集卷三百二十八

欽定四庫全書

兩宋名賢小集卷三百二十九

宋 陳思 編

元 陳世隆 補

華谷集

嚴粲字坦叔一字明卿邵武人羽之族弟也登進士授清湘令嘗著詩緝與朱晦菴詩傳相表裏

玉溪雪夜

雪霽天夜白月上江空明飲散客就船萬籟沈三更誰  
家竹籬岸摸索疎枝橫不著色與香令我毛骨清醉魂  
乘沆瀣看舞婆羅城

獨往

一逕歷紆餘獨往未到處豈曰崑泉幽心閒即真趣蕭  
蕭松有聲依依花自開樵翁向我笑問我何從來

昭君怨

欲洗鉛華淨那須畫手工玉顏翻自誤不似舊圖中



送黃炳

未盡連牀話忽忽又語離襟期無限事書寄若為辭昔  
別已十載重逢還幾時孤舟明夜月何處照相思

望彭蠡

萬壑氣交會今知楚澤雄水明纔辨樹霧合忽心迷空遠  
浦沈初月孤舟亂去鴻闌干已愁思漁唱入蘋風

春晚

向來得意在煙霞失脚黃塵負歲華過却海棠渾不省

夢中猶自詠梅花

秋八

秋入蘋風白浪生  
癡雲未放楚天晴  
青山湖外知何處  
中有斜陽一段明

陽關圖

人人腸斷渭城歌  
誰獨持竿面碧波  
可是無情如木石  
祇應此地別離多

月夜與張輯論詩

涼露初長夜，纖雲淨盡時。  
幾人還對月，與客共論詩。  
苦思常難穩，閒題或更奇。  
不應誇末俗，準擬古人知。

自樂平閱視渡舟取道太陽渡宿地藏院

康山問氏涉陽渡，平地訟揭來招提。  
宿疏峯結飛棟，研丹啟囊書點勘。  
自成諷佛香，觸深悟僧茗。  
來清供陽頽嵐氣生，鴻沒天宇空。  
向來山中樂，忽忽豈其夢。

盤谷圖

聲利爭馳毫末間，幾人能得健時閒。  
不須展畫相撩弄。

昨夜秋風憶故山

見梅

絕憐生意上寒枝幾度巡簷錯恨遲數點疎花人未見  
窓間早被月明知

春歸

抵死連宵雨不休今朝晴景莫登樓杜鵑啼得春歸了  
風裏楊花點點愁

薦福寺

即戴叔倫故宅  
今號戴公堤

石徑秋痕苔蘚深誰將清氣潤脩林戴公堤上古時月  
幾度涼宵照苦吟

招提游

幽尋愜所適蘭若白石靜天籟鳴松壑古意滿苔徑清  
泉醒客心啼鳥喚僧定留連不能去翫月歸路永

又

煩抱忽如遺僧境得清勝花發岩洞幽雲生窓戶冷來  
驂樹陰直歸棹川光暝遺思山蒼蒼半空聞夕磬

拾橡亭為黃炳賦

世上危機富貴身由來著意鬼神嗔  
到頭鍾鼎誰消得  
正要山中拾橡人

林和靖祠

白雲人已矣古屋自蒼苔  
林下誤疑鶴水邊空見梅  
市人攜酒至歌女棹船回  
檢點幽棲處湖光似向來

元上人見訪

昔子青青佩重逢怪衲衣  
樊籠留不住雲水靜相依  
習

氣餘詩句枯禪墮佛機東湖自塵外還帶夕陽歸

憶張輯

畏景如焚客路塵寂寥山店獨吟身多情唯有別時月  
低傍茅簷巧趁人

宿石潭寺寄黃炳

昨夜湖心共泊船一天星露宿寒煙朝來極目無洲渚  
知採蘋花何處邊

畫梅蘭竹石

正憶吟窓占竹坡風煙觸眼奈愁何  
梅蘭只作從前瘦  
石上蒼苔別後多

春恨

馬上東風吹酒醒空將春恨到江亭  
飛香寂寞無尋處  
煙映晚山深淺青

廬陵黃炳築亭所居侯山扁以赤子松自號赤松  
亭長之官鄂渚為賦詩

仙人遺世不曾愁但欲相期汗漫游  
亭長祇今閒未得



南樓孤嘯望神州

霧中早行

行人模糊畫中影  
高樹天矯空際雲  
樓臺幾處半隱見  
三島夢斷猶紛紜

秋思

風落葉間殘點雨  
月窺窓下不眠人  
秋清一片無誰領  
併作詩愁入鬢新

松雪

陰崖未知晴松雪自在白可恨曉風顛飛寒亂苔石

次韻宴坐畫圖

京塵倦來歸故山喜還壁淡交松挂在昔別猿鶴憶晚  
知閒味深甘為幽討惑尚念身在山佳處恐未識看山  
須全境一覽盡目力伊誰有巨軸亭亭掛空碧吾聞古  
靈匠能事畧翰墨盤礴溟滓初太素含黼飾妙手幹元  
微鍊此石五色天機一呈露真宰惜不得寫出萬古愁  
蒼茫思何極煙村帶遠市雲樹出峭壁有人閒倚攔飛

鳥亦自適俗間重小景局促無奇特五日十日畫大類  
宋楮刻誰會悠然心醉來眠對客

酴醾

東風暖迸龍蛇起麗日晴烘玉雪香可惜開時春向晚  
不教桃李見清芳

客裏

客裏何知度歲華春風香却一番花山行轉處聞雞犬  
楊柳陰陰賣酒家

紀夢

煙島空濛一鶴飛  
天風滿袖自吟詩  
覺來猶似非人世  
花影攔干月上時

送張輯游宣城

君撫淵明底樣琴  
肯于絃上要知音  
相逢塵事不挂口  
別去清愁總上心  
聽雨夜牀孤舊約  
看雲秋壑想幽尋  
他年跨鶴相過否  
應笑浮名雪滿簪

道中見茶花

朝來露濕欲寒天誰賞幽芳古道邊風味十分留貢焙  
浮花正自不須妍

巧夕添丁

書來知有客喜夢應維熊久作庭闈別遙知笑語同充  
閭非我願釣瀨是家風莫學天孫巧朱愚肖乃翁

琵琶洲

琵琶古怨猶淒清何年一抹橫煙汀人言隨波高下如  
浮萍神黿背負能亭亭不知水仙宮殿碧皎潔玉絃遙

映雲錦屏黃沙萬里音塵絕獨與鸚鵡愁青冥天際歸  
舟認髣髴江頭寒月傷伶仃悄然夜久天籟起往往恍  
惚游百靈秋風嫋嫋兮水泠泠俗耳箏笛兮誰能聽我  
眼如耳耳如鼻妙處不言心獨醒釣天住奏三千齡石  
鐘水樂遺林垆豈有寶器終漂零一朝誅蕩開天扃帝  
命下取呵六丁陶梭共起變化隨雷霆古餘山色空青  
青

池陽道中

脫葉舞風過別岸濕雲含雨上晴天脩途喜借晚涼得  
幽鳥一聲生翠煙

挽陳邵武

前輩聞如此今人見未多難將通介論不在語言科  
曹監開華近樵川借撫摩鄉評最期望一夢只南柯

夜投荒店戲成

喚起吹松火開門問帶嗔隨行曾有未同伴幾何人  
亂稗鋪添薦殘籬拾作薪夜寒難得酒煩扣隔山鄰

樂平至鳴溪渡有山與南豐軍山同名者余昔  
從嶺菴謝先生夢得游先生子湖畏友也豪于詩  
悅軍山之峭拔暢其吟懷自昭武徙家于市山築  
室曰西窓以朝夕對焉嘗命余記之余時從西窓  
樽酒論文為樂如是者十載今先生已矣感而賦  
詩

江西絕頂插晴空此地山名偶自同喚起西窓十年夢  
一樽何處酌詩翁



重到地藏院

泥濘行良苦青山且眼前題詩如昨日倒指已三年僧  
榻寒宵雨漁村落照煙薄游聊復爾終擬老林泉

寄張輯

不見吾張輯新詩何處吟身留江介遠秋入夜涼深燈  
影還家夢蛩聲倦客心歸來及佳節細把菊花斟

建德縣梅山寺

公退逢長日清游到寶坊山圍露天小徑遶引溪長苔

壁晴雲濕松軒暑月涼鐘聲半歸路回首暮蒼蒼

叨第後日者自謂奇中索詩

兒時意氣漫騎鯨幾向攔干袖手凭今日逢君成一笑  
却慙窓下讀書燈

風雨宿湖心

渺渺平湖四接天孤洲曾繫夜來船持鞭又逐風塵去  
却憶秋蓬聽雨眠

新晴

滑路愁騎馬晴天好放船水紋搖倒壁花影弄晴川夢  
寐驅馳在光陰少壯還心期猶浩蕩搔首白鷗前

舟中夜雪

落帆侵夜色客思正悽悽風撼瀟湘覆雲連宇宙低洒  
篷吹乍急欹枕聽還迷懶惰無清興誰人訪剡溪

七夕

纖巧逐時新誰將大雅陳天孫古機錦笑殺世間人

送戴式之

自小尋詩出江湖今白頭應嫌少陵讀不似子長游風  
雨夜愁枕鶯花春醉樓吟邊消息好懷古問沙鷗

茅舍

村居遠城市獨木渡塘坳筍補籬竹落松添屋茅童  
歸攜酒榼客至得鹽包隨分山中好低簷燕有巢

憩田家

晝間田家憩相呼隔短籬負薪髻引犢挑菜跣攜兒沙  
井和鰕汲村春夾稻炊老翁評貴糶覩縷舊年時

過江東

落花時節過江東  
濃綠山頭間小紅  
野店日長春寂寂  
柳陰搖颺酒旗風

騎牛圖

乃翁騎牛驢馱兒  
松間提挈羣僮隨  
驢逢短橋兒回顧  
牛背推敲了不知

戲友人

今朝有清興無處覓  
詩人寺占房空鎖窓  
窺榻有塵尋

芳知尚早報謁未應頻只在城中醉烟雲滿澹津

孤雁

一雁度岑寂流空音響哀雲沙天地濶霜雪羽毛摧力  
小知機早心危見影猜蘆洲迷處所飛遠正徘徊

蒙齋先生賦張通守佚老堂次韻

拂衣歸共白雲閒佚老堂中天地寬黃髮可教供鞅掌  
青山聊足對高寒杖藜行樂春風軟紙帳佳眠曉日圓  
林下未應忘世事併煩寄語謝家安

菊

寒林色枯槁粲粲籬菊鮮冷艷無俗韻孤芳弄秋金  
晶與高潔未覺陽和偏豈無兒女花誰能制頽年

歐陽道士歸自臨安

洞穴雲生窓戶涼道人宴坐但焚香向來游遍王侯第  
還似山林意味長

張輯馮去非話別

此夕真成別幽懷欲語誰梅花霜月曉獨起咏君詩

夜讀晉書

南來未省有良圖可更清談傲五胡  
撫卷興懷千載事一窓風露夜檠孤

午憩僧房

黃塵吹不到僧房窓紙風翻葉葉涼  
觸熱行來牽晝夢孤蓬聽雨下瀟湘

憶山中

山中桂香滿無復向來游官事何時了  
一年孤負秋



即事

僧屋藏深塢漁舟帶遠汀誰教雙白鳥來點暮山青

野興

身閒歸未得野興日脩然抱牘無來吏尋詩即散仙  
盃明松鑄月座引石根泉有客知余意清風三兩絃

重九後五日游齊山

官癡縛辰酉節物如相負茲游未覺晚黃花落吾手沒  
鷗江自迴晚葉山新瘦淒涼千載心西風一搔首

湘中

千古懷沙恨淒涼何處論坐看宗國事安用一身存落  
葉西風岸孤舟半夜猿年年江月白為照獨醒魂

寓京城和曾左曹韻

日日思君君不知京塵染盡帶來衣客心正自傷漂泊  
更看湖邊花片飛

車馬聲中又日斜可堪芳草思天涯來時憶別山中挂  
今見長安梔子花

閒居

盡日門前草青青不染塵生書方破卷幽鳥忽啼春失意成高興多閒信懶身不須憂世事廊廟有經綸

觀北來倡優

見說中原極可哀更無飛鳥下蒿萊吾儂尚笑倡優拙欲喚新翻歌舞來

李賈攜詩卷見訪賈與嚴滄浪游

石屏新卷裏曾得見君詩大冊煩來教平生慰夢思高

標去塵遠古調少人知汝與吾宗好風騷更屬誰

新竹

樹頭不動天無風六月還當日正中唯有滿林新長竹  
別生涼意襲簾櫳

月

只道今宵月出遲雲間不覺上多時夜深花影如清晝  
何處山頭一笛吹

二水聞角

少日鄉閭不解愁閒聽畫角起譙樓西風依舊闌干月  
獨自瀟湘萬里秋

軍行

野人自說老為農舊識戎裝紙畫中近日軍行渾見慣  
兒童嬉戲學刀弓

子陵灘

西風吹雨暮江寒想見當年獨把竿不是君王思故舊  
何人知有子陵灘

欽定四庫全書

卷三百二十九

一榻從容話歲寒  
相忘共作布衣看  
雲臺諸子成何事  
萬古清風一釣竿

汎湖

四邊天共水漫漫  
身在鴻濛縹緲間  
忽見浮空清一抹  
舟中人說是湖山

慈湖墨竹

先生萬慮盡空時  
元氣渾淪可得窺  
還有發生消息在  
揮毫烟雨一枝枝

戲筆偶然成此耳直將造化論錙銖不知茂叔庭前草  
有此風烟一段無

未開梅

老樹天機早潛回一點春寒梢方蓓蕾瘦影已精神冷  
淡看前輩芳菲總後塵更須香共色未是鑑花人

客裏

客裏還來此寒燈耿獨吟一官江國夢十載草堂心木  
落秋聲小蛩孤夜思深驅馳空自許冉冉鬢霜侵

戲詩友談仙

君期汗漫游不敢問所適贈別亦何有當辦鶴一隻還  
疑是凡羽不任載仙質乘煙寧假此聊以壯行色淹留  
非牽俗應未得良日空令施肩吾久待問詩律

秋懷

秋懷不到夢歷歷數寒更坐得楚天白吟教湘水清殘  
燈搖壁影片葉墜堦聲起看孤城霧人間事又生

初注清湘令寄馮深居

去非



深居定何處無便寄聲頻舊別芝山月相思楚水春白  
雲生夢遠華髮折腰新料得今書到看題笑故人

上饒界首傷曾殊

故人曾此賦梅詩人共梅花一夢非欲喚青山話前事  
西風吹淚濕征衣

秋風

門與姑山對溪邊有故廬別來三徑菊閒却一樓書水  
碓長腰米村船巨口魚秋風歸去好留滯意何如

戲友人

怪得詩情減一分  
知君為學有新聞  
塵中畢竟閒人少  
獨自開樽對白雲

早行

脩程避晝炎  
中夜征夫起  
蟲聲荒郊迴  
犬吠衡門閉  
行月色淡微  
霞露天際永  
懷高卧人幽  
夢繞蒼翠

西湖

何處春晴好  
西湖元已朝  
馬嘶堤上路  
船過柳陰橋  
敲

竹鶴聲起弄泉花影搖坐看游客盡烟水思迢迢

閏九

前月登高去猶嫌菊未黃秋風不相負特地再重陽

顏范祠堂

顏范新祠番水陽邦人來此識綱常海波瀕洞孤峯峭  
天字清明一鳳翔英蹟重尋餘古帖高情猶想賦秋香  
姦諛骨朽今安在三歎前賢死不亡

張德慶挽詩

擢第家聲在通班宦路亨為親遲受邑未老謝專城活  
計詩書富歲寒梅竹清閒中將道眼醉夢笑功名九袞  
猶身健聯麾見子榮笏牀歡節序鳩杖話平生世久傷  
零落吾猶及老成酸風吹苦淚一為典刑傾

調古

調古人能聽眉長世共妍家山夕陽外心事落鷗邊弟  
妹知何在風塵祇自憐孤燈照危坐不是少林禪

道傍木犀

路人攀折半成荒何似山中自在芳可耐西風相料理  
為誰消得許清香

示園丁

種竹宜疎延夜月澆花須早起晨陰溪邊釣石勤時掃  
恐有詩人來醉吟

舟中夜酌別鄧均

共對船頭月通宵語未終鄉關幾歲別筆墨小時同江  
影高低樹秋聲斷續鴻相逢渾草草明日又西東

發清湘

歸棹將秋色三湘是游勝灣回仍小嶼灘過盡平流臨  
水聞僧磬隈岩隱釣舟江頭每佳處沽酒小吏猶

花樹移方活丁寧莫損殘待逢春氣暖開與後人看酒  
任隨車載詩從就杜刊料應吟賞處說著種時難

栽樹未花開其如行色催遙憐今歲雪誰看一庭梅餘  
俸刊詩卷歸程賣酒杯輕舟下灘穩鷗鷺莫驚猜

繫舟

古岸人家少蒼茫此繫舟閨中今夜月江上晚風秋一  
水縈寒夢雙鴻亂遠愁湘源知不惡吾意肯淹留

夜行舟

忽報風波息梢人倚柁看開船星斗轉吹笛水雲寒犬吠  
知村近烏啼覺夜闌兒童將白石敲火趁晨餐

道中

客思曉寒凝初陽樹外昇氣蒸茅屋雪聲裂野池冰倦  
路行偏遠思山隱未能僕夫愁過嶺遙指最高層

冬日同趙與臻閒過雷園

地幽元在郭景好即為春  
相約同來者能閒有幾人  
風池行墜葉晴隙走游塵  
共爾烟霞契交情淡更親

寄鄧均

題書對殘燭幾日到江濱  
故里經年別清秋此夜分  
月昏斜映雨風細慢移雲  
數雁聲初過知君不寐聞

任機宜新圃

小劖煙苔地春生一笑間  
亭邀鄰圃樹臺挹隔城山  
幽



夢壺天曉清時暮府閒旋移花盡活容我醉來攀

岳麓寺

幾層攀石磴高寺白雲邊臺舊懷人古泉幽想鶴仙遠  
帆湘浦樹暮角楚城煙長是登臨處滄洲意惘然

吟到湘江倚釣蓬秋風日日望空濛偶來上到闌干處  
却指孤城夕照中

次韻菊花山人沈莊可見過之作

偕得山中集塵埃一半侵讀來知句好老去向誰吟高

義先投刺忘懷肯抱琴茅齋亦相約尊酒要同斟

重過雷園

靜處人來少園扉本不關寒叢淒古徑落日思空山倚  
樹吟情遠臨池立影閒晚林看更好一抹冷烟還

湘川逢故人

曾共粉榆社分攜知幾年乍逢如未識相問轉悽然月  
色秋看白潮聲夜聽圓醉來共鄉語不覺是湘川

兵火後還里

十載青山幾戰塵  
還家何處訪親情  
兒時巷陌今難認  
却問新移來住人

宿澤心

自從孤棹背鄉關  
幾度麻姑夢裏山  
此地不知何洞府  
石間松蔭水潺潺

夜發湘城

西風吹客衣  
一舸載書歸  
肯為身謀便  
而令心事違  
艤聲江月碎  
人影水烟微  
漸覺寒城遠  
沈沈擊柝稀

雪梅

報道梅邊雪未休披衣晨起上簾鉤  
孤根清健元如許空為花寒一夜愁

定王臺觀雪

清晨吟思獨凭欄十二樓中白玉寒  
此地古來風雪裏有人惆悵望長安

有客

有客翩翩來手攜瘦筇竹傲睨若無人  
風神動岩谷主

人延客入山中酒新熟飲酣出素書古篆不可讀欲問  
度世訣長嘯振林木軒然別我去舉頭但黃鵠

樂齊

顏巷當年事同門自少知誰言公子貴心與古人期望  
抑尋花意吟風弄月時人琴無處問空想考亭詩

琴

孤松風下絃秋清湘江湛湛湘山青一聲吹入天冥冥何  
處野鶴飛來聽

菊

秋籬霜露寒獨立爾良難不作過時恨從教耐久看風  
流沾臘藥臭味憶騷蘭孤淡逢心賞幽香故未闌

大虎頭灘

聞說前灘大虎頭行人愁絕欲回舟世間多有虛名誤  
不見錢塘海逆流

到清湘

客裏今年月相逢九處圓行窮湘水際愁到楚雲邊屋

內燈明路椽間瓦見天州城何處是遙指隔山烟

旋摘盆柑

金丸手自摘色味香三絕從來天者全風韻迴然別

兩宋名賢小集卷三百二十九



欽定四庫全書

兩宋名賢小集卷三百三十

宋 陳思 編

元 陳世隆 補

菊潭詩集

吳惟信字仲孚雪川人居華亭白鶴邨詩名藉甚吳  
中有老儒靡先生記問該洽惟信客吳遇諸塗叩以  
近詩因誦傷春一首靡先生屈膝下拜曰子謫仙人

也老夫雖欲效顰無可置喙矣與浮玉施樞交善投  
贈亦最多

春閨怨

細柳輕煙鎖畫樓樓中人去水長流琵琶聲斷梅花落  
別是春風一種愁

蘇堤清明卽事

梨花風起正清明游子尋春半出城日暮笙歌收拾去  
萬株楊柳屬流鶯

湖上雨吟

濕了荷花雨便休  
晚風歸柳澹于秋  
一生不作機心事  
合轉船頭向白鷗

雨後

雨後輕雲學水流  
惜春人瘦怕春休  
梨花却恐難尋夢  
燕子何曾細說愁

賀史守鳳雛滿月

玉手歌姬托鳳雛  
堂前畫額旋調朱  
春風吳會宜男艸

試問他人種得無

寄東畎曹侍郎

結網求魚事已遲，却非春艸不歸詩。  
斜陽一片山如畫，更把心期付與誰。

題秋江晚照圖

水光只肯淨涵虛，分浦通村路却無。  
風日向低鴻雁落，釣竿一半出菰蒲。

曉吟

翠帳香消捲碧紗  
風捎殘雨濕攔牙  
蜻蜓亦被涼勾引  
清曉低飛入水花

春咏

艸堂燕子未歸時  
香鼎灰蜚入硯池  
看徹唐人詩一卷  
夕陽猶在杏花枝

贈別上官良史

不惜黃花一醉君  
喚歌催舞語紛紛  
天涯明月空相憶  
寒雁無聲入斷雲

秋夕

西風吹露下秋空鳥鵲無聲占碧桐  
天氣微涼人好睡  
闌干閒在月明中

野望

閒與蘆花立水邊歸心客思兩茫然  
夕陽收盡天風急  
一樹寒鴉落野田

辭史侍郎

事到依人易策勲合歸收拾北山雲  
春風入手非閒用

種得梅花却寄君

春夢謠

銷金帳掩水沈煙  
髻滑金釵落枕邊  
魂夢不知春已去  
誤隨蝴蝶過鞦韆

拜和靖墓

墳艸年年一度青  
梅花無主自漂零  
定知魂在梅花上  
惟有春風喚得醒

重拜和靖墓

片玉沈山艸亦珍  
斷碑殘石當麒麟  
君王別為開門戶  
不欲梅花見路人

閨怨

病起傷春獨倚門  
喚人鸚鵡隔簾聞  
無情最是東風惡  
瘦却梨花一片雲

仙興

宮殿高高在五雲  
鶴搖松露滴行人  
洞門不放東風過  
留得桃花一院春



山居春興

林雪消寒滴春風入艸廬好山分客看閒地課童鉏竹  
瘦偏宜鶴泉清直見魚邇來因苦咏零亂一牀書

寄大使趙清臣

擒吳纔了合封侯何止區區古蔡州一著高時全國體  
十年危處與心謀山川恢拓春風遠天地清明王氣浮  
白雪滿頭勲業大不應忘却赤松游

寄蔣重珍祕書

焚香誦易與天游君命相催不肯休時節固知來則是  
功名却以得為憂翠蓬雲氣生衣袂金殿陽光動冕旒  
此際一言能悟主始堪回首舊林丘

寄越上高疎寮

便教煙雨畫成圖爭似歸來有賀湖鏡裏精神西晉有  
詩家標準晚唐無惜花春盡鷺吟苦敲竹風清鶴夢孤  
世事正多心早懶著書贏得靜工夫

立春日即事

檢殘玉曆又春來造化無私命轉乖  
照水莫嫌窮面目  
看山長有好情懷  
生期惠遠眠雲過  
死問林逋借地埋  
詩到夜寒吟更苦  
一枝梅雪映書齋

送伯氏秋潭謀居

朝吳暮楚幾時休  
未必江湖有白鷗  
萬事莫如歸去好  
一椽當為老來謀  
春天吟思行花徑  
夜月琴聲坐竹樓  
但得餘齡無俯仰  
曾公食粥亦風流

送王夢升入道

不肯輕迷固有天星冠霞帔竟翩然人能變體方超俗  
丹到成功即是仙伏洞黑龍聽夜咒傍花白鹿伴春眠  
哦詩更欲全清致當以彌明作正傳

贈史泳

烽火窮邊幾度愁亦曾將死博封侯謗興在彼情誰恕  
事過知君痛自休跨馬甲衣春雪白射雕弓箭曉星流  
救時正屬英雄者更著工夫必到頭

移居即事

山移無復昔人賢隨分長安辦一椽掃室敢言天下志  
閉門儘可雪中眠攜瓶與客同沽酒接綆過鄰自汲泉  
到此始知閒是福居山未必似居廬

呈雲麓史侍郎

若教縷縷說漂沈却恐無慘老不禁百拙難隨今日巧  
一貧方識古人心牛羊歸盡荒郊潤猿鶴愁多故國深  
亦欲以詩為活計世間何許覓知音

謀生

謀生一事到成功消得湖邊地幾弓  
韋曲有花留杜老洛陽無客問盧仝  
春風燕子虛簷外夜雨蛩聲小徑中  
所立規模雖冷淡絕勝彈鋏舊漂蓬

贈越僧意書記

一衲冰霜二十年不知妙用自誰傳  
心能轉物方為佛詩到名家亦是仙  
喜客稍寬沽酒禁愛閒多結住山緣  
今冬約我西湖上同看梅花坐釣船

自序

一劍辭家竟陸沈，夢思空向故廬深。  
槎迷河漢千年恨，樹隔關山萬里心。  
衣垢正憐貧未去，鏡明忽有老相尋。  
春歸不與人為約，青艸催詩亦嬾吟。

秋夕

雨聲雲氣暮蕭蕭，羅扇恩疎井樹凋。  
心事暗隨歸夢去，壁燈留與可憐宵。


咏貓

弄花撲蝶悔當年，喫到殘糜味却鮮。  
不肯春風留業種，

破氍尋夢佛燈前

次王漢和見寄韻

扇思已盡漢宮秋  
空憶金鞍遠玉樓  
九辯不歌黃菊老  
斷煙零雨為誰愁



兩宋名賢小集卷三百三十